

■ CONVIVENZA

Tgi che na sa nagut sto crair tut

DA PIEDER CAMINADA*

500 onns – e finalmain in zic prudent.» Quest patratg m'è filà tras il chau cura che jau hai vis avant in mais en la citad veglia da Glion catolics e reformads sesend paschaivlamain in sper l'auto. Il motiv è stà la represchentaziun al liber «Comander» en il rom da las festivtads commemorativas «500 onns Refurmaziun».

Cura che jau hai visità ils onns sessanta a Glion la scola primara na s'accurschevan ins anc nagut da la prudentscha menziunada a l'entschatta. Pertge che a Glion regiva alura guerra (religiusa). Ubain formulà in zic main marzial: ils catolics ed ils reformads na pudevan betg star or in l'auto. E quai influenzava sfurzadamain era nus uffants (innocents).

Atgnamain cumenzava l'antipatia vicendaivla tranter ils catolics ed ils reformads gia cun la naschientscha. En il quartier da Sontga Clau vivevan alura – cun intginas paucas excepziuns – mo catolics. Ed en il Städtli quasi mo reformads. Tgi che fascheva ils emprims pass da sia vita en il Sontga Clau catolic n'aveva da far nagut cun ils reformads dal Städtli. Era pli tard betg. A scolina gievan nus en chasa-pravenda catolica tar ina mungia, ed ils contemporans reformads vegnivan protegids ermeticamain dals catolics en l'uschenumnà «Pfrundhaus». Gnanca en la scola primara era in'avischinaziun pussaivla. Ils reformads vegnivan scolarisads tar magister Menn, ils catolics tar sora Angela.

Ina fin ha questa separaziun disgraziada chattà pir l'en-



cura che la nova chasa da scola da Glion è vegnida inaugurada e cura che la scola primara spartida tenor confessiuns è finalmain vegnida abolida. Ma alura eri gia meina tard. Alura avevan nus gia fatg nundumbraivlas bataglias da ballottas cunter ils reformads. La plipart cun la meglra fin per nus – perquai che nus eran numericamain pli fermes. Ed jau na poss era betg ma regurdar ch'in scolar primar catolic avess gughegià da s'inamurar en ina bella mattetta reformada dal Städtli. Qua restav'ins pli gugent senza marusa che da barattar brevinas d'amur cun ina mattetta da l'autra vart dal Jordan.

Tut be tgutgarias d'uffants? Tuttavia betg. Ils creschids eran schizunt menders che nus uffants. Ins era consequent – e gieva uschè bain sco pussaivel in a l'auto ord via. Perquai cumpravon ils reformads dal Städtli lur victualias obedaivlamain tar Trottmann, ed ils catolics dal Sontga Clau tar Pajarola u Elvedi. Era maridà vegnivi u rigurusamain catolic u rigurusamain reformà, pertge ch'ina lètg maschadada fiss – tenor la «ductrina stgetta» – stada nuschaivla per il vair salit da l'olma.

Conculpaivel da quest teater nuncristian dals da Glion era stà in tschert Johannes Comander da Cuira. En il decurs da la Refurmaziun avant 500 onns aveva el revoltà cunter

il clerus catolic despotico ed uschia purtà las ideas reformatoricas a Glion. Essend che sias ideas n'han betg pudì persvader tuts è ina part da la populaziun da Glion sa decidida per la cretta nova, entant che tschella part è restada tar la cardientscha veglia. E quai dal tutfatg senza cumpromiss, uschia ch'ins sentiva la discordia confessionala – vesair sura – cleramain er anc avant 50 onns.

Avess jau ils onns sessanta sco scolar primar defurmà catolicamain chapì il context fiss forsa quest patratg filà tras mes chau: «450 onns – e gnanc in zic prudent.» Oz sai jau che jau na saveva da lez temp nagut. Ubain per laschar vegnir a pled la famosa e prudenta narrativa austriaca Marie von Ebner-Eschenbach (1830–1916): «Tgi che na sa nagut sto crair tut.» Era sch'i sa tracta da tuppads.

* Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch (e reformà) da Castrisch.

Vocabulari

filar tras il chau – durch den Kopf schiessen/gehen
 represchentaziun al liber – Freilichttheater
 s'accorscher – spüren, merken
 marzial – kriegerisch
 chasa-pravenda – Pfarrhaus
 scolarisar – einschulen
 disgrazià – hier: unselig
 battaglia da ballottas – Schneeballschlacht
 gughegiar – wagen
 marusa – (Schul-)Schatz
 brevina d'amur – Liebesbriefchen
 tgutgarias d'uffants – Kinderkram
 lètg maschadada – Mischehe
 ductrina stgetta – reine Lehre
 salit da l'olma – Seelenheil
 cretta – Glaube (ref.)
 cardientscha – Glaube (kath.)
 tuppada – Blödsinn

Unterstützt von der Lia Rumantscha



Lia Rumantscha